



*Selasa, 15 Februari 2022*  
**Ogen: 1 Yohanes 4:15-21**



**Kekelengen Si Serta**



**A**di kita sekalak perjuma, ngatakenca maka sinuan-sinuan e mejile, kai nge si bahan jadi sukatenna? Sinuan-sinuan e mejile, adi batang kayu ia, mbue ras meratah bulungna je nari maka nggo ikataken serta adi mbue ras meramis buahna, me bage. Adi bage kin nggo payo, sinuan-sinuan saja pe ikataken mejile adi erbuah, bage ka pe kita. Dibata Bapanta selaku si mada geluhta enda pe ersura-sura Ia gelah kita pe erbuah bas kegeluhen e. Batang cina si mbur ngenca bulungna pe minter nge ruah si mada juma maka gancihkenna alu bibit si mbaru, si banci mereken ulih si mejile.

Kinitekenta pe bali bagi sinuan-sinuan si arusna erbuah, kinitekenta arus erbuah silang-langna lit 9 buah Roh ntah 9 ulih pendahin Kesah si Badia i bas Pustaka. Tapi i bas ogenta senda, puncak dari pada buah kiniteken e jine, e me kap kekelengen si serta. Kekelengen si serta i bas ogenta enda e me kap penggejapen keleng ate si erbuahken perbahanen nyata si icidahken man si lit isekelewetta alu biak si nggit ngalemi. Ngalemi salah kalak banci ertina ngaloken ia amin gia lit salah ntah kurangna banta. Ngalemi pe ertina ngelupaken kesalahenna, janah la relem-elem bana. Keleng ate ras pernembah ate e lit i teruh kuasata adi beluh kita ngaturkenca. Kekelengen adi icibalken la nggo pernah keru, e maka labo kita rugi. Tapi ate nembah adi ipebelin-belin mpekeri kengasupenta guna ngidah kesusahen kalak ras nggejabken perbebenna, janah erbahanca kita dem alu kejahatan sabap reh belinna ate nembah. E maka kalak si la erkeleng ate pe gelari nge pembunuh, sabap atena nembah e sipemenana kel munuh kengasupenna ncidahken si mehuli. Bere maka kam dem alu kekelengen si serta, e me alu ngalemi salah kalak ras tetap cidahken si mehuli.